

靜

廉

齋

詩

集

皇太子質親王題辭

落落舉此舊典型遺編繙讀眼重青十年離緒江湖老

千古交情翰墨靈細甚真參工部律裊然如授伏生經

分明出處精神在甲子從頭數列星

詩起雍正甲辰迄於乾隆壬寅

清於琴筑偉鐘鏞愁苦歡愉各異蹤始信名言歸閱歷

還憑大雅出春容低徊今雨苔痕斷想像華嚴墨瀋濃

先生少日嘗楷書華嚴經全部

他日雞林問聲價歸存合竝兩高峯

喁于講席記分曹險韻爭拈百戰鏖看到鼠姑春又暮

抽將虎僕興難豪

集中書房酬倡之什尤夥緣牡丹疊韻作今尚黏子齋壁間春光如舊故

紙塵封蓋不勝今昔之感云

小文敬禮評量闕餘業超宗付託牢

得萬松清響絕門前無復載醇醪

先生
子告後
主講萬松書院

乾隆乙巳春杭郡故人子部郎金三吾來謁攜其尊甫
少宗伯海住先生詩集請序於余公壬戌魁天下與余
弟雲從爲同年友又與余聚處最久相知尤深誼不敢
辭公餘檢讀全編喟然而歎曰嗚呼余之與公相得無
間也蓋三十餘年矣公性廉潔恬淡不苟取與其於學
也凡諸子百家之說靡不綜貫溯其生平得力不僅在
於詩也顧當公未遇時詩教未行於場屋公其時已究
心聲律評隲唐宋元明諸詩之合於程度格式者以陶
淑後學且少歷險阻足跡幾徧天下故凡數十年前困
頓憂勞之況以及致身通顯之後所經山川之險易風

俗之變態悲愉欣戚觸於目而有動於中必於詩焉發之大要歸於和平坦易出入少陵王孟之間蓋此特公之緒餘然亦足以見公之素蘊矣猶憶余壬申歲偕公典試江右星輶往返郵亭旅館夜月燈檠之下相與賡韻聯吟合書分弄極筆墨馳騁之樂繼以

內廷侍直復得晤言晨夕從容討論者十餘年嗣是而公以病乞休竟湖山老矣壬寅之秋余請急歸里舟過武林時公已臥疴在牀從榻前握手欷歔道故臨別泣下不能舍去今則謦欬難追墓草已宿獨此遺膏賸馥沾漑將來撫卷之餘幾低徊不忍卒讀而猶覽其遺編

以想見其風度之端詳性情之高潔又未嘗不依依遇之也公所著經義雜著甚富行當垂諸永久獨念余衰朽荒落篋笥中尙有宿稿數卷未敢問世而精力所存弗忍棄置恨不獲與公商訂其得失也公以會狀歷官九列世所豔稱而清苦淡泊有羅念庵李九我之遺風焉其立朝持己之大節與夫制藝翰墨之精純久爲當代宗仰故不具述而獨敘其宿昔知交之情以志余感云漳浦蔡新撰

吾師少宗伯海住金公出處行實之大端珪謹著之於誌銘矣先是歲乙巳令子三吾郎中以公靜廉齋詩稿十八冊屬珪校勘蓋自癸卯訖壬寅六十年所作五千餘首無體不備也憶珪自丁卯秋受知於公暨庚子使閩過杭公款珪於湖上中間出入南北相左者幾二十年故雖親炙門牆尙未有以盡闕吾師之涵蘊也及奉詩稿本攜之篋笥又幾五年乃得盡讀全集望洋而歎如觀華嚴寶藏目眙而神駭也竊覽吾師之詩而思吾師之爲人直內而方外其天性篤於倫紀故於根源哀樂之地醇深愷惻老而彌摯讀之使人孝友之心油然而

怵然而其立朝敬事授經忠告尤見正風大雅恪恭直諒之所充流有不愧乎表裏如一者若夫師友親串之久而敦閨庭子姓之讎而肅自起家出入以迄

予告林居聚散遠近勸規愉戚皆一一見諸詩至於大篇險韻陵韓蹈蘇腹便五車役使萬怪又獺祭贗植者之所望而卻走也公以魏科峻望游陟寅清賡颺

勳華衡杓瀛嶽孺翰之士得其片鱗毳翮可以挾雲而漑津矣豈知公之得於天者旣厚而沈酣經史丹黃點勘旁及梵乘孜孜矻矻終身不倦其學力之裨益尤不可誣也古稱蓄道德而能文章若吾師者言行本末又

何歆乎凡集中應制及試帖諸作別爲一編其全不能
盡刻也擬掇其卓犖精粹者若干首先授之梓校竣爲
舉其崖略以告觀者受業大興朱珪拜識

靜廉齋詩集

目錄

卷一

古今體詩七十六首

卷二

古今體詩四十八首

卷三

古今體詩一十三首

卷四

古今體詩四十首

卷五

古今體詩五十五首

卷六

古今體詩七十二首

卷七

古今體詩七十四首

卷八

古今體詩五十八首

卷九

古今體詩七十六首

卷十

古今體詩三十二首

卷十一

古今體詩八十二首

卷十二

古今體詩七十三首

卷十三

古今體詩四十一首

卷十四

古今體詩四十五首

卷十五

古今體詩六十九首

卷十六

古今體詩六十九首

卷十七

古今體詩六十八首

卷十八

古今體詩一百七首

卷十九

古今體詩一百五首

卷二十

古今體詩四十一首

卷二十一

古今體詩六十四首

卷二十二

古今體詩八十首

卷二十三

古今體詩五十七首

卷二十四

古今體詩一百二十二首

如洋

恭校

外祖父海住先生詩稿竟作而歎

曰洋

生也晚侍先生日淺其於立身行己之道

曾無以窺測於萬一而詩又先生之所爲末焉

者也傳之亦奚足增先生重獨念先生之詩以

性情學問爲根柢故境雖屢變而其中卓然有不變者存蓋自春官屢躋梗泛漳濱以至通籍承明遂閒初服前後六十餘年以一身坐閱升沈愉戚之故而心聲所發順成和動之音粹然若出一日昔人謂孟郊未第天地礙於門庭而春風得意一日看花迄不禁自改其常度則先生之養之純而守之固也詩雖小道奚不可以見其端哉先生之詩五千餘首其賡和

宸章試士帖括諸作另編以爲館閣矜式此則大興朱石君前輩所手定者凡得詩若干首離

爲二十四卷將付剞劂而式似元李兩舅氏屬
如洋以數語跋之尾乾隆丙午夏六月望外孫
汪如洋百拜敬書於澄懷園之致爽軒

外大父海佳先生古今體詩全集凡五千餘首
手自繕寫成帙藏之家塾乾隆甲辰式似舅氏
授弟祖同編次屬大興朱文正公訂定二十四

卷畱以待梓文正爲先生門下士而祖恩與祖

同又文正門下士也溯自甲午歲先生

予告南歸祖恩兄弟始得親從受業時先生望

抱孫甚切歲丁酉自邗江攜以歸試讀書今雨

堂問字評文晨夕不離左右嘗示詩云應向祖
庭侍聊從外氏棲又云我無孫可教送別語酸
嘶蓋飲食教誨懃懃懇懇以視含飴繞膝有加
摯焉

祖恩

庚子鄉薦溫印侯座主

常綬

亦先生

門下士榜發喜而有作云主司言念君子溫爲
我階砌移蘭蓀又慰

祖同

榜後瑁璫云但祝老

夫恒不死卯科正好作同年先生蓋於雍正癸

卯登賢書也其期望之殷誘掖之切若是

祖恩

辛丑捷南宮先生賦詩寄勗仲秋歸省值八十

覽揆之辰猶捧觴爲先生壽迨甲辰

祖同

以獻

賦入薇垣而先生已於壬寅歸道山矣自後

祖

恩兄弟中外馳驅故鄉罕至刊集一事末由省

間嘉慶乙亥

祖恩

自嶺南入覲歸途抵浙晤棠

友表仲

夢

相與亟謀付梓屈指訂定之後忽忽

三十餘年深用瞿然爰捧以入粵于羅陽官舍

公餘展讀凡字句體例潛心參究悉稟當年遺

訓辨論惟謹並屬朱庚垣學使

階吉

同爲商榷

庚垣尊甫亦先生外孫壻也其中有疑義譌漏

者復郵書浙中再三考訂務求至當如是者又

四載于今年三月始克蒇事授剡厠距先生之

歿已四十年矣嗚呼先生之詩格律謹嚴試帖
一編藝林久奉爲圭臬願讀全集者朝夕以跂
乃遲之又久始克刊布流傳豈非文章之表見
固自有時耶至若先生性情品概之見于詩者
詳述蔡朱兩相國序中汪雲壑識語言之尤悉
祖恩與雲壑同爲先生外氏諸孫雲壑游登魁
選克成宅相而自幼躬承誨育則不逮祖恩兄
弟之親切迴憶童年撰杖之初執經請業甫逾
舞勺迄今遺書在抱天涯薄宦瓠落無聞暮齒
駸駸不覺已屆周甲雖幸得從事校讐少效服

勞之職而訓言在耳警欬長違三復斯編不勝
華屋山邱之感楊惲祖述之思忼忼其曷有已
乎謹述纂輯歲月及愚兄弟從學淵源附于簡
末以誌永矢勿諼云嘉慶二十有五年歲在上
章執徐余月外孫姚祖恩百拜敬識于羅陽官
舍之扶荔山房

靜廉齋詩集卷一

仁和金 姓雨叔

登鎮海塔

甲辰

倚天拔地有如斯，劫外剛風盡日吹。
俯瞰琳宮森象馬，旁臨海窟隱蛟螭。
莊嚴法寶元無恙，憚赫潮音異昔時。
絕頂也應通帝座，我來忼慨欲隳詞。

塔上鳥雀甚喧戲，作長句示西園禪人。

寺樓徐聽鐘聲罷，一綫飛光透窗罅。
塔鈴到曉更丁寧，宿鳥初驚爭慰藉。
置身那復愁漂搖，浮圖半腹同山椒。
此中窟宅萬千所，彈射不及躋攀遙。
翱翔千轉環其巢。

相呼共啄來春郊春田足食飽更樂飛鳴下上長喧呶
我時掩關坐清晝竹韻松聲和泉溜脩然耳畔奏虛籟
特苦繁音巧相構僧寮宛轉曲徑深一日一往窮登臨
祇緣棲集最高處四圍宣唱殊難禁老僧蹙眉三歎息
清淨諸天徒默默投雁充食無生心咒蛙不鳴有神力
書生亦解鬪禪機自是長空任鳥飛矧從如來證多寶
中天佛日尤熹微去年七月風雨惡海若因之逞殘虐
無邊震蕩走蛟螭不止喧豕爭鳥雀釋迦靜聽海潮音
魔怪何緣動道心爲授鳥窠菩薩戒聲聞說法到如今

西竹居懷古

海門風浪動鯨魚東注還同洩尾閭巨塔巍然山作鎮
桑田長遶化人居

金爐濃爇白檀香一襲天衣賜上方轉盼袈裟換龍袞
可曾從此寄行藏

偶同蟬蛻委塵埃晚向南都竟不回座是沈香金作鉢
白衣猶勝紫衣來

誰將小篆勒貞珉野老吞聲恨不泯妙選高僧齊入侍
賺他官女是何人

村寓雜書

生平不解事終日守寂漠饑驅懶出門卒歲將焉索徐

思食舊德那敢厭飄泊扁舟到海濱盈筐載要約履畝
肆征求先民昔有作我行向城市我僕散村落徘徊覽
風景此地殊不惡齊年有七子禮數欣簡略詩酒共盤
桓有時還縱博興來無少長雜坐恣諧謔酒闌燈灺時
輾轉自籌度欲解北門憂寧貪此間樂凌晨振衣起放
舟入西郭

篷窗有嘉客邂逅足清話高樹倚長標舟流知所屆霜
落野田空平原露方罍茅簷負暄坐村老宛如畫迴眸
引身起一笑醒聾聵年衰支節僵欲拜愁萋拜自云舊
佃徒爲君理疆界行年過七十稼穡匪敢懈公田有餘

潤百畝共溝澮由來播嘉種不免雜稊稗只恐好家居
織兒還撞壞郎君肯相護教督勿辭憊我聞頻領首斯
語通善敗艱難不可忘吾亦凜深戒

平疇兩茅屋相延此中宿破壁隱燈光中宵鳴杼柚愁
懷方耿耿不瞑類魚目西南一里許斜枕芝山麓老樹
留空枝密葉綴修竹風聲動地來村犬競追逐高低合
聲勢遠近相往復非關有心聽自爾感幽獨褰帷發長
歎寢語羨僮僕

幽谷鳥嚶嚶空亭鳥啞啞縱步出郊垌蒼頭共弩射小
物本忘機對人殊整暇挽強先命中一矢不汝貫寧知

射生技未足騁雄霸潛蹤久窺伺失意增歎詫此手定
何如芴觀晒機詐

曠野朔風鳴愁雲埋白日我時挈儔侶共向田間出東
西本相望舉步盡盤厓矧當傾側時衣袂自奔逸危橋
尺咫寬飄飄人上慄嚴冬水泉縮凍泥還過膝垂堂有
明戒御風乏奇術專精勿芴睨去如飛鳥疾回頭顧餘
子惘惘徒自失臨溪笑相語無事計優絀危疑震撼中
勝之以專一

草舍闌無人入門空佇立無端指顧間村童如蟻集倣
裘有遺毳相排競趨拾主人自外來誰能責拱揖我生

未識此欲語翻蹇澀居閒等酷吏馭物猶束溼云胡背
鄉里井渫可共汲蚩蚩諒寡助一一輸所入四座盡譁
囂余心獨於邑同時富貴家升斗不可挹居然再三過
閉戶效冬蟄但爲平等觀何忍較絲粒

記夢

己酉

孤枕清宵夢重幃昨夜風悠悠三載別渺渺寸心通貧
賤期交久幽明歎路窮相看惟掩泣魂斷月明中

秋夜述懷

炎景忽已逝商飈動林樾高旻隱河漢斗柄轉西揭觀
此風景清循階步明月秋士固多悲憂思悄焉發當年

厲文戰不肯顧津筏九月長安城孤飛逐蒼鵲意氣自
無前文采實有闕山肴雜蔬筍禁鬱尙肥脂居然背時
利豈復遇天玃一戰旣摧頽七載遂沈汨奔林羨窮猿
守宮困磨蝎謀生艱俯仰思舊感存歿歲月箭抨弦才
情線折韉把酒駐丹顏掩鏡慙華髮沈沈杜門坐壯志
頓銷歇今年屆鄉舉公正斷私謁東南信才藪人文聚
吳越探珠匪遭睡獻玉不愁荆高秋鎖院開變化自超
忽嗟余方屏處埃塵漸埋沒前驅久騰蹕後騎恣排突
驚心壁上觀詎敢相摩宰從此謝經營無緣老耕墜捧
檄足娛親行腰長官笏天門開蕩蕩力弱臥土窟將飛

翼還斂欲起蹄更蹶四氣盡如秋涼風況砭骨徘徊清
影下軀幹徒肆兀此意共誰言書空成咄咄

寄兄

秋日旣淒淒秋懷常惻惻歲序甫逾半我事亦孔亟傳
家在書卷不解藝黍稷菽水復何歡念此令心盡頻年
幸豐稔衣食自滋殖告糴苦無贏誰能充我食茅屋秋
風吹崩泥類瓜副下有獨眠人未送邛山北一木信難
支壓覆不可測新愁牽舊恨每顧淚霑臆當時庀家事
俯仰藉兄力豈意馬羣空相隨受銜勒聞兄到江漢頗
復蒙賞識升階呼共語命坐常在側有客長安來言兄

齒鄉齋前書未云爾傳聞恐非實將欲慰高堂無那白
緣飾王途方坦蕩寒士無失職藍田柳子厚賁渾皇甫
湜脫身簿尉間自古限程式矧今不次恩鸞鳳出枳棘
因風示別紙佇以剖回惑秋冬才轉瞬我友偕觀國舊
日緇塵衣女手重要襖思兄自惻悵感時增歎息秋花
強呈媚彌有可憐色枝葉日相違生意誠偈仄雖離南
翔鴈高飛避矰弋蟋蟀鬧空階殺氣殆偏得盛衰定有
數進退惟自克努力奉清時無爲計通塞

瘞盆魚

主人慕魚樂愛養苦不具瓦盆如甕深盛暑此焉銅環

游適相值驚迸祇成聚得食墮飛蠅迎涼降甘露我特
閔其窮時爲代呼籲相邀共臨看浮沫已如霧搖尾幸
君憐喁喁仰空訴居然賜洗沐瀕死被知顧盆池千萬
里不肯縱沿泝余策未全收終知鮮生路秋風漸蕭瑟
荇藻滴清露爲爾慶更生喝死諒無懼茲晨竟陸處僵
臥失生趣將毋慕炎熱冷落感深痼肅殺在天時正命
抑其素蹄涔困神鯉涸轍埋枯鮒如爾安足悲哉堪飽
鵠唼曩曾充近玩豈得寡恩遇呼僮瘞深草垂蔭有高
樹得所愧空言抔土庶相護

月黑有懷

明月伏其魄列宿收寒芒微光遠相映慘慘氣不揚飄
風自西至青女方催霜非無後凋節搖落愁羣芳端居
怯衣薄游子徒輕裝何如南來雁結陣還吾鄉

放言遣悶

恩不報怨不讎生平意氣總蕭瑟丈夫局趣懷深羞怨
可讎恩可報一飯之德有必償睚眦之言安足道君不
見車中張祿騁辯口一見傾人舅與母武安已死任安
平王稽謬作河東守相君愛人貴以德殞身覆族皆君
力兩家便與魏齊同只向平原苦相逼又不見彭王使
者眞健兒手攀鼎耳陳危詞千秋知己負冤死得官竟

去誰埋尸百身莫贖猶輕捨漢法偏能誅怨者史策空
標烈士名燕齊枉建樂公社吁嗟恩義自古薄不記多
情記纖惡屢叨非分卽尋常偶然善謔還遭虐基局中
心恨不平幾人恩怨盡分明千金輦過淮陰市年少何
煩裂眼爭

亡室殯所感賦

總帳三年夢青山百歲居故人思未遠嬌女服將除暮
雨人歸後煙村月上初祇憑先隴在長與護幽墟

將適漢陽留別家人

彈指歲云莫離憂感百端江湖方浩蕩風雪太蕭寒自

有四方志安知行路難隨陽同旅雁莫慮客衣單

許墅南橋觀村人爭渡

東南諸水滙設險守其隘平旦大桁開輕舟萃鱗介吳
江老阿童頭角聳烏髻紛披據津要如食飽而噫推排
競分寸掌距擬纖芥心怵語爲嘶憤發齒頻齟齬呼風
颭颭震蕩水澎湃矜豪利先縱伺間巧相賣竿頭幸初
進掉尾儵而邁氣盛自崢嶸望窮空睚眦鼓棹快逍遙
膠杯愁困憊轉瞬泛安流猛勢有時殺利涉取諸需占
易感明戒吾聞風波險此地乃無望奈何蝨其間縱橫
生變怪篙工逞身手懷毒舞羣蠱無復尾相銜終令吭

遭搯擾擾竟何爲
逡巡動深喟水德本寬平人心多芥蒂徒供壁上觀久鬱得奇快

銀山

銀山高出蒜山巔
補就東南半壁天
淮海片帆通遠勢
金焦兩點護中堅
城開鐵甕潮聲歇
鎖斷金陵王氣偏
北府至今嫺武備
凌江蒼兕擁樓船

昭關

在銀山上

南徐形勝古昭關
楚客東來遂不還
上國乍通車戰起
孤臣飲恨鬢毛斑
當年失路浮菱水
今日通津遶蒜山
回首雄藩空設險
枕江拳石戍樓閒

金陵晚泊

潮回夾口靜驚湍無限江山倚櫂看風景蒼寒飛燕蟄
川原搖落臥龍蟠吹笳曲罷霜凝戍伐荻人歸月滿灘
江左風流如昨否頗聞玉樹未凋殘

采石磯懷古

南朝幕府開姑孰百里傳烽到石頭想見雄藩爭上地
祇憑采石據中流

仙侶同舟趁暮潮詩狂頻用酒杯澆騎鯨客去風流歇
江月千秋影寂寥

楊林渡口擁生兵千里江南尅日平老將尙餘劉信叔

豈知勲業愧書生

逐鹿中原路未通且憑全力定江東遙看山石嶙峋處
奇絕開平跳盪功

識舟亭

北望蠓磯

旅泊憑高一散愁孤亭遙控大江流吳波不動老蠓臥
吹笛何人倚柁樓

中江塔

斜綠蝸角上青冥萬舸千艘水上萍目送征帆天際去
不須重問識舟亭

黃石磯懷古

皖口西風急強藩頓陸梁舟師遺讖在弧矢下天狼

九江聞角

晚歲空江旅思驚霜華月影共淒清前汀雁下潮初去
別舫燈殘酒罷傾擬和征人關塞曲却吟商女琵琶行
誰能不墮思鄉淚那更吹愁角一聲

立春後三日作

入春三日風氣清潯陽江上扁舟輕孤煙時傍戍樓起
遠水漫連沙岸平雲光轉眼向空滅草色漸看隨意生
歲行盡矣且瀟灑回首鄉關空復情

紫雲臺

楚山挺雄秀力與江水鬪峻嶒見天骨鑱削露清瘦扁
舟傍雲根帆走海濱鬣冷然御風去靈境恍親覩千巖
豁空嵌平萬竅隱穿漏遶壁綴蜂房比屋啓圭竇泉沫
歎仇池天光射懸雷藤蘿互鉤貫草樹紛寄僦瓊瓏契
心賞可悅尤在皺誰鐫摩厓碑縱橫古文籀誰披方寸
縠組織九章繡微皺飄瓦裂怒脈駭犀透疊疊魚網箋
蒙蒙龜策繇春漲感韡紋風漪捲絺縠波磔妙縈回峯
巒競奔湊宛轉海神鞭精能鬼工鏤選勝到公園搜奇
米顛褒拳石未爲多對此祇增陋我瞻吳楚間鮮或據
其右彷彿是吾鄉飛來小靈鷲

感夢

庚戌

歸魂縹緲夜將闌生死悠悠淚未乾錦瑟已沈滄海月
雲屏還怯鳳城寒遼西夢斷鶯啼久江漢書成燕去難
芍藥有情縈別恨胡香無力締重歡憑將好句題紅葉
爭似秋風掩素紈記得醒時珍重語平陽好倩後人看
湖上晚歸

湖波遠映鴨頭綠雲氣低垂雉子斑煙景蒼茫晚歸去
一林紅葉隱青山

野干行

并序

野干刺讒口也譖人者信有罪矣入鮑魚之肆可宗之

義謂何春秋責賢者備吾取巷伯之卒章焉

西域有小獸厥名維野干文章慙豹隱屑吻迺多端猛
虎引獅子百獸不敢譴野干工偵伺來往二帝間非徒
保身命時噉所棄殘忝竊本非分傾險不自安大傷小
者死其又何利焉潛營并吞計彼此巧構煽猛氣互咆
勃畜怒雙睛睨狡獪苦無幾詎足誇神姦兩雄試共語
豁達披心肝於爾謝無有於我亦如然翻成開口笑那
忽遭欺謾殺之恨非武況乃常周旋強援一朝絕求食
殊艱難窮於無所入槁死誰相憐不義必自斃庶以懲
輕儇晴窗開梵夾宿命聞真詮歌以諷君子自反寧無

愆族類乃非我柰何輕作緣已往復何道常作如是觀

贈族姪質孚

文淳

文章古無價飢者不可食君何不自烹辛苦窮雕刻精
心赴深阻猛氣鬪疾力風流讓前輩此理僕云極升堂
濟其馘翻令少顏色餘子徒紛紛日出燭火熄高才任
疎放豪士羞謹敕謬誤正無多奇字殆難識望之是耶
非疑之故曰或三豕憶傳訛四馬懼遭劾俗眼指瑕疵
寧爲逞胸臆千里不留行蟻封折旋踣茲焉非細故願
子勤修飾其它鮮遺憾吾乃不能測衰宗生此寶疊疊
爲來偈游賞盛烏衣微子舍居北誰能移玉樹近在庭

階側虎犢虎狔間顧之三歎息

寄兄 并序

大兄行役於楚者三閱歲矣攝官承乏未有寧居雪暗
江湖音問希闊春來連奉手書上慰高堂下勗兒子語
意乃無感激而情懷寥落中賢失意之流性自被放南
旋光陰忽忽如斷夢不復記也緒論及之有悄焉不自
醒者小詩代柬亦勞者之歌已爾

春夢京華遠秋風江漢深功名千古恨兄弟數年心少
壯乃無幾沈吟還至今誰憐多白髮辛苦覓華簪

過隔

壬子

牖形如偃月伋伋背相向渾河中蕩潏盤束乃逾壯峩
峩千斛舟銜尾逆流上風波互吞吐宛轉搯其吭舟師
色無主悉力與之抗丁寧鉦聲喧指麾旛影颺長繩飛
百道掣曳彌澆漾當頭轆轤轉雜進短長仗一前再三
却百俯時一仰騰擲亂猿猱顛連墜瓶益力竭與隨旋
曝然齊放杖狂瀾怒噴薄勢激轉奔放洶湧廣陵濤浩
淼三川漲龜魚望龍門欲去更惆悵東南有正供天庾
資遠餉河靈方效順胡乃隘而妨譟呼驚飛廉歛吸片
帆張平添萬夫力蹈藉起塵埃居然挾聲勢快剪破高
浪嗟爾亦何能胥蟻神所相扁舟怯漂蕩在險謹相讓

鼓枻趁迴瀾平進固無恙因識濟川才委蛇歷傾攘一
葦泛橫流安能免依依傍瞥見險巇平終令鬱紆暢長嘯
施樓前神情喜方王

書四溟山人集後

文人務標榜始合終乖離聲華匪金石臭味應差池先
生起清淵風雅傾當時論詩揭三要允爲百世師招攜
王李輩七子紛追隨有倡必有應或挽或則推諸公解
逢世相將上雲梯顧視地上友轉眼知爲誰先生懷舊
意古處敦交期貽書頗鐫責取鬧昨暮兒歷下倚豪橫
角健如生犀琅琊助抵突衆口交排擠縱橫奮鱗甲絡

唾成癥瘕平時甘弟畜徒欲憑光儀魚兔已兼得誰肯
留筌蹄世能竟如此那足評高低翻然脫身去梁苑摘
妍辭琵琶轉商調新聲歌竹枝當筵披寶扇晚遇傾城
姿人生貴適意爭名欲何爲至今三齊間佳話傳嗟咨
我來訪遺刻高閣勤登躋

集藏尊
經閣

雜感寄知舊讀之噫

吁嘻當年田水月感憤緣數奇託意在窮達見解則已
卑顧我亦有取失勢常遭欺諸公愧明聖何至忘嫌疑
新城慨文獻白雪懷芳菲試看古樂府寧足調孺篋却
指練江句標舉爲世嗤小杜詆元白鼎足無偏畸進退
在好惡吾竊爲惜之評詩觀大體胡乃攻微疵翻手已

陳跡定論千秋知蛾眉被謠詠所嗟交誼虧題詩附卷
末願作將來規

清涼寺雙檜

志稱是秦時物

涼風平野升朝暾爲瞻雙樹尋祇園亭亭夾峙嚴幢蓋
左右拏攫爭騰鶩一株挺立淨如削倚天銅柱窮攀援
高柯凌雲露牙角老榦溜雨無癡痕東偏一株更奇絕
拳曲擁腫蟠深根雲紆雷回變凹凸芝菌鬱勃元駒賁
龍頭困蠢壯鼎腹牛背瘕蠡傷車轆栴榴作枕擅文采
五石之瓠成大樽泥塗偃蹇幾摧抑破空直上何軒軒
潛虬驚飛老蛟舞千古突兀撐乾坤雄雌未決倩誰辯

妄言妄聽髯爲掀板牀側坐久凝眺時有雲氣流綢緼
清涼法界離塵網龍樹王繞兩足尊肯爲秦皇蔽風雨
五大夫松何足論

天寧寺唐槐

清涼老檜雙蜿蜒天寧尙有唐槐存天年未終中道夭
死灰重向爐中溫此言傳說信然否探奇便欲窮株根
城陰左轉寺門出古碣漫滅聊可捫東廂香爐炷香罷
老僧前引穿重垣清陰滿院日光薄四圍精舍忘朝昏
中庭突兀朽株立似遭野火相煎燔神焦鬼爛結冤魄
不灰之木生崑崙琴紋隱隱虵腹斷鍾乳疊疊鰲蛸痕

燕昭墓上老表在狐狸照影遙崩奔神奇變化本臭腐
精氣鬱結通游魂霜皮圻裂卷龜殼太陽迴照萌芽茁
枝枝條出破空去五龍天矯愁雲繁南枝偃蹇黑螭走
飛電搜逐催騰騫失勢墮地不肯上驤首西北窺河源
雄飛雌伏迴殊趣同根何至求攀援盛衰榮悴偶然事
古今真偽憑誰論逡巡歎息繞三匝仰見殿角颺風旛
大槐安國在何許疑有螻蟻分雄藩唐人小說舊曾記
莫驚夢醒增煩冤

登光岳樓

飛樓縹緲倚天開百尺丹梯獨上來終古浮雲封泰岱

祇今弱水接蓬萊金鴉拂曙初迴翼玉虎中宵自枕魁
上層供文星象眼底紛紛皆培塿側身東望魯連臺

題某人元旦登岱宗觀日初升圖

天雞一唱扶桑樹夜半滄溟起燭龍一片光華新眼界
千尋雲海盪心胸赤城隱現朝霞舉青嶽低迷宿霧濃
元日恩光君早得祇緣身立最高峯

游趵突泉作

風日喜清美獨向城西游連山湧蒼翠凝眺清雙眸會
聞岱陰水渴馬懸厓投見曾子固齊州二堂記伏流五十里掩抑
勢轉迢土脈偶疏薄穿穴成瘡疣言尋濫觴處沸井揚

浮漚圓珠雜方玉迸落不復收蜿蜒龍首渠決溜鳴沙
洲方塘白石贅戢戢噉輕條赤鯉隱鮮藻翔躍隨螭虬
最後第三泉偉觀茂與儔騰波出海眼飛雨移龍湫錡
鏗銀甕裂涌現冰輪浮却疑虛無底瀑布翻倒流亂石
倚洄湫清風助颼颼突開一角去曲岸通輕舟逶迤入
城闕蕩漾明湖秋老樹引天籟颯沓荒祠幽明妝想二
女遺象誰能修

王阮亭香祖筆記云娥皇女英祠在趵突泉今廢

空餘憤泉結

萬古蒼梧愁石刻樹盈百乘興循牆搜南豐及松雪誰

最居上頭却就石梁坐倚柱安茶甌名泉七十二品味

得似不

一統志濟南名泉七十二趵突爲上

濟南山水窟倦客貪淹留憑

襟想高處試登白雲樓

在泉東書院中本李于鱗故居樓名

送族兄元美

志彥

之孝感卽寄大兄九弟

恩恩戒行李黯黯惜分張君到楚江晚我行燕塞長途
窮還贈淚錢盡却羞囊霜雪方交積枝柯漸隕黃相從
依傳舍何以慰高堂捧檄知堪喜看雲意轉傷暫爲終
歲計曾有宿春糧遼落關秋氣羈棲感舊鄉春令空自
急鴻雁幸成行一語憑相報家音數寄將

立秋日湖上卽事

時漁戶訴種荷虧課當事准盡刈之刈之不給則以長竿掠折

之 甲寅

白雨橫飛浪打頭采蓮舟逐釣魚舟怪他風景今朝異

無限紅妝泣素秋

閒從淥水動輕舸沈飲無何暑可逃
賸有碧筒千束在更誰折取注香醪

落盡紅衣斂翠眉綠珠應赴墜樓期
誰知蓮子中心苦不見清秋露冷時

花雨吹殘小劫終漫依蓮座叩生公
拈將了義爲君說空色空香泡影中

輓天台學博江汝舟

作楫

同年

乙卯

玉室金堂不可尋石梁虹影自沈沈
沈文通舊有銷魂句別賦爭如恨賦深

書吳中洽廷華司馬南臺集後中洽又號東壁

東壁遙占冊府開三秋孤月映南臺無端健筆縱橫甚
坡老新從海上回

倪山友濤先生小照倪註備吹錄一百卷著周易四尙七十四卷丙辰

秦時松樹千章植中有幽人研道德陰崖草屋風蕭蕭
硯水自生山石泐先生宛在東牆東蹤跡不同風致同
五千文字埽除盡想見一畫開鴻濛世間何物縈懷抱
此生甘向書中老莫輕爾雅注蟲魚祇笑童蒙拾香草
賢良文學公車徵蜩鳩喜得隨鯢鵬似聞病鶴作人語
丹青萬里愁騫騰名山事業憑相付副在京師傳掌故

卽今空自帶經鉏石室之藏孰緘固已知高拱謝浮名
未能免俗心忤忤強箭難穿魯縞破寸莛欲發洪鐘聲
先生把卷晚後生霜天那忽蒼蠅鳴眼前圖史陳縱橫

陳開周煌鄉薦戲柬

陳叟瘠而長竦立如野鶴性情亦差似時恐懼增繳蚤
歲擬逃禪鍵戶守寂寞眞解定何如漸與世緣薄田廬
及妻子棄置比糟粕行藏寄僧舍但覺此間樂風波生
宦海萍梗失棲泊君眞有深慮那得無驚愕懸知功名
際塵網久纏縛對客了無言閨中勤著脚奇文發光怪
麗藻炫丹腹化龍魚尾燒得駿馬首絡遇合頓如君有

目豈皆矐我從識君來經義仰磨錯誰云巧相負有獻
遂無酢因之屏弗道聊可縱諧謔握手語蟬聯時或拊
髀躍舌本妙瀾翻胸次轉開拓君意故無它蹤跡殊詭
託少見每多怪衆口迭咀嚙畏影自生疑展轉落奴度
意色偶非是門巷迹如削惟余善排調屑吻少關鑰居
然令公喜相賞在疏略不見絕交書庶保歲寒約君無
嫌我真更進苦口藥君往游京師意態莫如昨熱熟乃
宜人到處飲醇醪天姿任孤峭正可置邱壑龍性竟難
馴爭如屈信蠖無端遭謗訕祇是欠灑落於我漸忘機
何緣受煎煇矧君通佛理所戒乃偏著善爲平等觀惡

眼自不惡我行逐君去席帽補青箬疾疢間憂虞懷若
度危約出處固難量欲進步還却羨君冲霄翮一舉破
寥廓初春幸少事僂俛挈裝囊長安居不易有米若爲
索襪被就君談嚴城聽宵柝

雲共庵雜題

龍泓遺蹟記曾探一片雲

峯名

橫掩佛龕過嶺倍看林壑

美居人指點是邱庵

雲共俗名也

茗柯新瀾乳泉餅休問茶經共水經香味漫誇先比色
雪中初見草芽青

山廚砥石幾摩挲隻履因緣憶達磨七步祇今留一跡

莫教錯認辟支韉

方塘橫石隱莓苔孤月斜臨鏡檻開功德池中功德水
老龍深夜吐珠來

午夢驚殘冷篆灰茶香爭似墨香來行穿竹翠臨危磴
接取山泉滌硯回

陽城座主寵示七律二章敬步原韻

公姓白氏名嘉穀字樹滋

康熙壬辰進士雍正癸卯以翰林充浙江副主
考復命改御史尋以議獄緩罷官乾隆戊午姓
得重調於臨清

權署

戊午

漢廷京兆偉堂堂千里星軺玉尺光匠石有時憐散木
侏儒一節表微長登樓祇是愁難遣收器終嫌貌不颺

慙向太行山畔過豈期重此遇孫陽

風采流聞憶往年東來杖履自脩然喜看白髮心逾壯
斗覺青雲志益堅折簡故應題好句讀書元不厭陳編
卽今衣鉢承親授莫問冠笏有附蟬

清明感夢泣述

誰復懷歸詠愼旃夢魂空到几筵邊殷勤屏當無餘物
彷彿提攜勝小年渴葬祇爲游子計飢驅猶幸故人憐
北邙寒食逢閒客愁說江南有杜鵑

河隄春感

己未

柳枝比似去年低麥隴依稀認故畦倦客放懷憑野望

暖風疎雨衛河西

新阡已復草如茵
杜宇何心戀好春
喚醒天涯游子夢
經年留滯濁漳濱

從母節孝周孺人頌

恭惟從母自嚴
嬪周衿綱夙戒
蘋蘩克修
孝惟萊匹德
是鴻壽尊章
授室諸姑待
謀愛日難迴
夢天無覺風
樹裁驚瓊林
并拗伯道無
兒王戎死孝
廣廈連雲吁
嗟傾撓千鈞之
引一木之支
捐生易耳宗
祀誰尸嬛嬛
嗣子于屬于
離風寒月苦
露隕霜摧詩
傳蓼蔚淚染
機絲兒哀母
恤母痛兒知
喪示有終葬
危不得悵望
棠梨豈惟

我特斧屋堂坊同開兆域用安先靈未亡之力貌茲孤
露戒爾漂搖匪安於幕如集於茗旣資鎮定亦藉和調
睽弧旋說堅冰自消華黍蘭陔春暉高映子又生孫傳
家有慶洊雷致懼習坎重傷晝號夜哭文伯之喪襁褓
提攜掌珠新耀更倚松筠延緣蘿蔦樂在含飴悲仍茹
蓼孝婦貞姑影形相弔山猶可徙谷豈常寒曾爲砥柱
無復驚湍恩勤已篤牖戶長完慈雲重蔭孝筭平安雛
鳳九苞龍孫千里綵服萱庭助修甘旨王母怡顏受茲
介祉繞膝鳩車領之而已式瞻前烈彤史遺音誰嗟弱
植倚柱而吟誰憂天隕恤緯情深明於大計爰有同心

或乃熒發纏悲斂吟龍劍終分金環罔探之死靡它幸
無遺憾玉碎珠沈弛於負擔猗歟母德金石同堅粵從
蚤歲祭悱文傳比踰七表祁母神全劬躬燾後五十餘
年扶危繼絕餘慶重延大輿之運旋轉坤乾 聖代崇
褒明揚節操鄉校同聲外臺入告

天子曰俞旌門表道潛德之光善無不報汝南清節桐
瀨高風千秋譜牒輝映江東克生女士壺範攸隆精誠
之至上與天通門庭喜氣鬱鬱蔥蔥大哉錫類施及無
窮吾母平生尤憐女弟苦節之貞久踰成例孰叩輶軒
臚陳件繫我奉遺言志之罔替竦聽 恩綸遠從雲際

失喜而呼淚盈還制必有歌詩附傳永世述德抒情俯
慙清製

將適萊州寄大兄保定

庚申

九日登高作山東兄弟心已成經歲隔不減對牀吟

去年

九日見懷之作今春得之

宅畔非無菊臺邊詎有金燕雲增悵望縹

緲雁飛深

未穩漳濱臥還從鬲上居

鬲津河在德州城東七十里世說平原督郵在鬲上住余

去冬自臨清至德州

寄人常屏跡懷古獨長歎史紀秦皇病臺空

董相書九河連碣石誰與辨歸墟

南北舟車會河梁據要衝頗嫌鄉信杳時喜足音登旅

舍寧甘寢餘糧又宿春萍蹤長轉泛望斷尺書封

門巷都如昨秋期社燕催有山窺洞壑無徑長蒿萊始
識三間屋真須二陸才蕭條今雨歇何日草堂開

寥落齊州客行行萬里沙披雲觀海市占月上星槎莫

解窮途恨翻將怪語誇東坡生日近應致棗如瓜

兄今年六

十

王偶亭

元禮

自登州歸談蓬萊閣之勝且錄長公

海市詩見示同用其韻

秦皇遺跡寒煙空成山斗入滄海中丹崖

山名

飛閣倚鰲

背人間自有蓬萊宮珠璣萬斛富海藏

山下爲一一雕彈子窩

一一雕

琢煩神工偶然幻景復何有仙官徵役鞭癡龍虹藏不
見蜃氣見天遣奇境娛坡翁名章俊句涌泉出勢與溟
渤爭豪雄五百年來此樂少山陰高興誰能窮雲霄拊
翼邈輕舉海鏡亭名倒影搖沖融作詩肯落古人後鏘洋
清韻聞號鐘雙螭隱壁墨香透折簡寫得題元豐石刻云元
豐八年十月晦書呈全叔承議吾生幸有濟勝具待攜藤杖如青銅攝
衣絕頂一長嘯與君同御冷然風

金萍舸

就館黃縣仍前韻送別

埽除落葉寒庭空沈沈燈影書幃中連宵清譙喜相屬
覆卮几上其音宮昔君年少騁裘馬新詩更以窮而工

鯨牙掣取弄明月鵬翼斬斷驚蛟龍有才如此尙淹蹇
十年憂歎成衰翁我從欬唾領珠玉稽首傾倒宗盟雄
才人自古富經濟獨繭抽緒無終窮參軍豈足屈孫楚
座客暫須依孔融筆端解吐掞天藻山中自有鳴霜鐘
良田何必愁晚歲今茲不稔明年豐大方已見北海若
我輩獨少西園銅萊陰聞說有仙窟乞丹寄我憑西風
將入京師依韻答謝偶亭

蒟騣蹤迹凡馬空孤月沈吐寒雲中

同赴東萊者四人唯偶亭在

江

郎恨別那可道愁聽燕市兼吳官

偶亭時慷慨誦別賦云

更無絲

竹與陶寫排悶祇憑詩句工剡溪藤滑彩毫健右軍風

格如游龍定知海市許重見疊來清韻仍坡翁錦囊新
詠關奇麗莫邪光掩干將雄家門遠愧珥貂盛歲寒誰
念綈袍窮感君投贈意良厚黍谷迴暖春泥融長安幾
度犯冰雪天津橋上嗤龍鍾不圖重此應詩識五日行
去同元豐海市詩序云到官五日而去僕前送萍
舸偶亭復以此韻相送因歎爲詩識也鏘鳴
金石氣方震洛鐘元是銅山銅雲龍上下快追逐遲君
桂苑吟秋風

沈端恪公夙興夜寐圖

辛酉

殘月在樹冰霜棱嶒清明之氣與雞俱興

內經蚤臥蚤起與雞俱興

昧旦不顯聖有明徵周情孔思仔肩弗勝奉公憂國臣

職是應永惟匪懈夙夜兢兢整襟待漏風度端凝辨色
而入嘉謨敬承密勿匡贊惟良股肱年德未究三槐弗
升易名贈策光映瑤牋四海想望垂天一鵬豈惟枌社
馨香豆登我瞻遺像塵懷鏡澄如聞告誡安處無恆勗
哉哲嗣業與世增靖共爾位無忝繼繩

徐調階指揮色空圖

先生昔在漳河西曾以一手障金隄憑夷罷舞支朴祁
伏誰敢吐氣凌虹霓泥行乘橈慎蹉跌慣看跳鼃欺跛
鼈浮槎歲滿自歸來過眼煙雲纔一瞥九衢塵裏還相
值手版朝朝歎顚顛未見華嚴樓閣開儘教曼衍魚龍

戲憑將寓意寫生綃海蜃青紅影動搖莫管是空還是
色總從不見不聞消宦海風波正如此卻笑當年子蘇
子去官五日且遲留貪向之翠觀海市

靜廉齋詩集卷一終

靜廉齋詩集卷二

仁和金 姓雨叔

陳母歐陽孺人節孝頌

子憲祖舉孝廉方正爲國子監助教 王戊

雪罨冰封松生勁骨鑪炭銷光玉英乃發維昔甲寅老
漚豕突八桂震鄰鳥驚獸狝節母從夫潛形巖窟瘡癘
侵膚慙於戈鉞六日三喪吁嗟天扃隱几老姑動而必
蹶襁褓呱呱未踰三月宗祀阤危不絕如髮媯後必昌
云何翦伐一葦之杭終踰溟渤一木之支竟扶華闕丈
夫女哉精誠激越愛死有待定變倉猝送往事居任兼
存歿匍匐行喪海更艱脆凶盜寇攘室無遺核溫炎妄

起焚巢隱樾殃禍獨丁根株并掘金石堅貞顯於鐫劖
荼苦如飴了無怪咄扶持轉徙牽蘿補闕乃卜牛眠開
封勒碣供養阿家躬親春肺苛癢抑搔慈顏無艱克享
遐齡於吾手沒顧念小郎畜之不幸仍撫其孤恩勤罔
歇熒熒弱子旋勝典謁駿足方騁謹其銜楸論寶無人
何辭卞刖年德轉升鴻名昭揭 詔舉賢良名卿結驥
正席師儒光生袍笏歸侍北堂陔蘭秘辭雲表烏頭翹
瞻雙闕節孝崇褒欽惟 制曰過眼風燈千齡儻忽彫
史揚芳無虞澳汨文紀瀧岡豐碑突兀庇賴後人其興
也勃哲嗣還朝重調校楊顧我肩隨如蛩引壓朝暮齋

鹽朋懽展竭學海窮源言尋津筏畫荻勤劬書田起堡
孝笋緣階忠泉遠竭高行禮宗名懸月謁敬頌徽音宣
風百粵

爲族兄江聲

志章

題六憶圖卽送歸里

圖爲倪穉疇國璉前

輩作

西湖新柳

三載西郊住攀條向板橋故園千里夢風絮共漂搖卻
羨青門別歸程興轉饒湖隄新水闊隨意盪蘭橈

山寺讀書

閒倚仁王高閣放眼杭州越州塵市了無呼洶風帆一

任夷猶漠漠江山靜對時時詩句冥搜三十年前佳趣
圖成一老風流

巢湖泛舟

楚山倒影鏡中鬟斜日風漪瑋瑋班記得先生佳句在
朗吟春水送曹還

寒江通禹鑿春水送曹還江聲過合肥句

鑾江晚泊

江練初平羣山坐晚相屬一尊布帆安穩莫問歸期幾
時當返雁下蘆洲翩翩自遠

雲林夜雨

往踐雙湖約支筇待水蓮窠泉晴滴雨松翠晚霏煙一

宿都如夢三生又幾年感君懷舊意凝望轉悽然

美兄家元

別號雙湖汪積山先生又號水蓮往年同宿松靄山房今二君相繼下世

東城訪友

水竹平分處城東老圃家君歸尋別業應向此間耶

聖駕東巡 盛京恭謁

祖陵大禮慶成恭紀

柏梁體一百二十句

維清緝熙宣重光

帝握金鏡開珠囊文謨武烈崇觀揚紹庭繼序無時忘
七廟觀德嚴蒸嘗鼎湖龍氣隨軒黃厥初生民徵發祥
坤輿靈脈蟠東方高山天作橫大荒氣攝遼海恢全疆

作豐遷鎬王業昌留都近接

珠邱旁千秋弓劒橋山藏通追來孝維

皇王感物增思懷秋霜睠言舊里沛與豐

叶

乘輿親奉

慈寧宮

叶

歷吉日今以東行薦新承禧豐年穰嘉禾委

積連坻京

叶

郊原初築圃爲場如弦馳道遙相望千乘

萬騎龍騰驤鸞旂翠蓋風低昂疎林掩映丹青裝登臨

引興摘奎章行圍縱燎國俗常三田秋獮禮固當雲羅

天畢紛舒張白羽捷發攢飛蟲

叶

霜蹄撇烈殷雷礮百

禽棱遽走且僵他他藉藉阮谷量三驅弭節毋胥戕擇

取上殺除面傷用儲乾豆烹羶薌威弧照野狼收芒絕

幕萬里皆康莊淵旋雲被臨神鄉佳哉王氣鬱蔥蔥

叶

都廣之野務隅陽神靈陟降馮元堂肇稱殷禮行升香

延帷接桓羅斗匡季秋之月日在房晨瞻鳥注垂中央

朱霞盪海明樽桑金螭列侍齊冠裳駿奔祇奉湯孫將

清醑既載調和羹

叶

九州美味陳縱橫

叶

歆馨顧德神

來饗

叶

澄心凝思亶徊徨几筵如在餘悽愴

叶

洪鑪盪

滌提天綱河山風雨勞斧斯靈旗石馬爭飛颺松楸萬

古瞻龍興

叶

緬仰

祖德何靈長念茲繩武敢不覆禮儀告備旋天墉

叶

高

臨宗政啓南端

叶

羣工蹈舞則稱慶玉卮初進萬年觴

雲天德施

去

蕭露灋錫宴親舊隆異稂鯁齒鮐背駢趨

踰醉酒飽德詠太平

叶

皇歡旣浹陳縹緗闡揚

先烈窮形容

叶

盛京一賦垂琳琅世德舞奏音鏘洋三

侯裁足羣兒倡慶成大禮絲綸降

叶

恩覃中外熙春

暘文德旣昭武節彰選徒

大閱傳牙璋颺賊雲迅俄

方攘天行星陳高韻昉敦營七萃環武剛黃龍大牙常

處中

叶

申嚴號令昭戎經

叶

虎拜日召鷹揚姜武夫併

是干城良教達禁成節制嚴

叶

如飛如翰如漢江

叶

洗

兵早已挽銀潢藏險於順威靡亢元菟眞番紀樂浪東

震日域咸稽顙

叶

保塞屬國茲益恭

叶

事畢功宏澤沛

滂透迤仙仗方迴翔山川望秩酬靈貺

叶歸格

祖禰循寶城

叶

關輔絡繹馳騎迎

叶

翠華至喜鈴鈇鈇

景雲麗色開天閭先問起居朝

壽康遂升前殿臨濟蹕雕輦止蹕還東廂聲明文物增

輝煌昔始往矣菊未英

叶

今來照水收虹梁征途回遠

時節更

叶

師無罷露情徜徉先期規畫罔不臧日月垂

照無遠障

睿謀神運非贊襄曠典具舉殊安詳瑤圖

萬葉流芬芳

聖德廣大彌穹蒼敬

宗尊

祖凝羹牆展親錫類榮宗祏

叶

發揚孝治光昭明

叶

春

溫秋肅恩威雙

叶

聲靈赫濯踰溟滄坐見九譯來梯航

堯仁舜孝孚萬邦

叶小臣

何幸親虞唐

五月十九日拜

命典試粵東恭紀

甲子

策對三千字刀藏十九年

姓癸卯鄉舉壬戌乃成進士

雲達方詆蕩

絲羽亦踟躕猥荷掄才任深慙薦士篇明珠南海貢象

罔莫空還

東阿阻雨

我行東阿道飛翠迎羣峯燕南地平衍堆阜裁蟻封此
境頗難覲知舊欣重逢怡神領山趣爽氣瞻天容後騎
忽馳告咄咄俄頃中回頭直北望疾雨乘橫風黑蜨吐
昏霧連鼓雷公攻奔騰破空至盡揜青芙蓉白鷲勢斜
注旋轉隨西東始知山川氣呼吸通鴻濛光景如可狎
善幻非其衷進退兩無據興敗心沖沖半嶺見茅屋褊
陋如牛宮衝泥匍匐進廣廈同帡幪屏息避其銳坐困
重圍重雲光屢開合萬木呼號洶亂流四山下石角爭
撞春縈紆翠微徑似欲浮輕舸平川想奔放何減百步
洪檐溜引懸布少見驚兒童叫噪裸相逐偃蹇塗泥壅

或時仰天笑點滴攢雙瞳方貪水嬉樂唯恐泉源窮我心苦無賴無賴尤天公畿輔比慳澤炎蒸方蘊隆桑林勤致禱宛轉精誠通何如移此雨早見禾苗芄斯土幸滋液豈必煩龍工卻來空山裏沾溼欺吳儂村老竊嗤議官語何夢夢二東高下隔水旱殊窪隆此間餘宿潤此外多飛埏一雨徧千里齊魯同占豐

皇情周海甸指顧風雲從試看大澤降次第施神功官爲萬民喜何惜停車鉉矧今涸可待歸壑無留蹤捧手謝高論良足開心胸整駕卽前路沙水紛橫縱屯雲漸披散列嶂仍寵從沈吟出山去吾獨慚山農

宿東平

雨歇晚煙生遙指東平宿橫流漫城闕馬渡正齊腹肩
輿冒奇險水上踞浮屋時時一低仰挹注滿筐簾中間
或蹉跌吾亦委溝瀆高厓槐柳根如骨脫於肉秋禾下
田種束矢露其鏃不知水涸後仍可冀成熟填淤信肥
美落漲故應速無聊空覽想庶以免縮朒注目尋丈間
泔泔必顛覆嘗聞臨淵戒境本現平陸風波有時定靜
鎮在當軸掀舉出泥塗非余力所戮禮容因雨廢無復
道旁伏張燈坐孤館壁影見嘖蹙終宵蛙黽喧勢敵萬
鵝鷺回思行路難歎息詠維谷輶車尙如此其柰驢尾

禿重遣嗣宗來合作窮途哭

閔子廟 在銅山縣閔子集

四科標德行顏閔乃其冠顏配閔未升專祠明薦裸我
來閔子集廟貌想巍煥頽落竟如斯拜起但長歎何人
堪列侍版位殊漫漶夾侍二像神牌剝落蕭蕭禾黍風颭影荻花
亂竊恐日湮沈樵歌墓田畔前瞻武穆祠靈衣動虛幔
立德與立功次第匪難判誰把俸錢修莫教仍舊貫

蚤發廬州

天星草露兩微茫日日征衫趁曉涼最愛合肥城畔路
水風十里白蓮香

舒桐間風景可愛雜言志美寄同年姚石農

範編

修

遠山青近山碧虛壑飛泉如曳帛晚稻種早稻收野塘
浮鼻見眠牛草際迎人蝶林間喚婦鳩垂檐自有濃陰
布曲徑都將短籬護客飯就松棚兒喧占沙渡卽此是
花源何嘗隔津樹輕雷送雨晚來多可惜籃輿草草過
因風寄語石農子如此田園可歸矣

渡二郎河

跳波三尺雪水激石梁絕塞裳怯水深投足愁石齧水
石方急爭人適犯其烈腰輿同戴斗兀坐凜孤揭橫斜

大蟹行琴中傳指訣衡溜勢隨旋一步餘九折猱升迭
攀援去鶴躍整行列斷岸快先登身輕脫羈絆如何咫
尺間頓踣若遭批入坎幸無虞平塗竟蹉跌猶喜緩須
臾前時頂俱滅我僕遠狂叫我乃徐有說吁嗟古語胡
不聞莫躋於山躋於垤

渡潯陽

淮肥渡後無乾土飽歷崎嶇澗谷間今日中流真自在
聽風聽水看廬山

入廬山過太平宮

岡阜重重掩溪流曲曲通孤村松葉火平野稻畦風暖

翠晴還溼疎花晚更紅蒼茫撫殘碣遙認太平官

同李文木

本樟

秋部游東林寺

橫峯側嶺雲盤縈丁丁何處鳴銅鉦入山生客被山笑

列成始識東林名

寺側有東林汎杉松夾徑

寺門直短襦拳足

山僧迎蓮宗顏敗此先見當殿古佛勞扶擎龍象無聲

黯垂泣遠公遺像還如生高賢十八儼圍坐道俗參半

皆同盟文成題壁木龕護粉墨摧剝餘光晶雙鉤勒石

閱真蹟昔時賢宰功匪輕會聞北海帖重刻難向瓦礫

搜瑤瓊殘碑押字印文在元符祠牒尙書行募疏一角

子昂筆但署今月亡年庚善男子善女人等幸不磨滅

緣精誠李侯嗜古想摹搨紙墨全缺心忤忤蓮池無復
白蓮瓣芭蕉葉大旋抽萌名泉汲引長智慧泉名上人無

乃韜其精殿材神運假龍力激水涌出如箭抨吾鄉靈
鷲濟顛井亦有斯說誇愚氓華嚴樓閣仰東峙鐘魚塵
積停敲鏗羅漢松傳西域種晴雲擁頂莓苔纓前山截
嶮勢雄壓賴此雙樹標崢嶸上方金像育王造後周竟
免洪鑪傾江夏賀公紀親見賢聖自合憐忠貞阿誰題
柱作禪語九江推使其名英獨修丈室表功德猶愈於
已毋譏評高高下下左旋出西偏繚繞穿柴荆三笑堂
臨虎溪北圖寫故事懸中楹神明太俗俗工作僧言自

晉傳 皇清紛紛疥壁少佳句故應淨埽留陽明門前
林木蔚深秀僕夫久待眠縱橫香爐縹緲足雲氣勃公
又向巢間鳴飄風送雨颯時至俗駕恐致山靈驚怱怱
揮手別僧去莫遣過溪聽吼聲溪橋路滑屢延佇林表
突兀浮圖撐西林相距咫尺耳屐齒未到晴空瞠天親
無著好兄弟放一拈一誰所令羅浮風雨作離合過客
往往迷行程斯游我意苦難厭君亦未了含餘情三秋
彈指返征轡刻露清秀山容呈匡廬太白讀書處長謠
定不嫌同賡重來選勝在冬孟二妙後先終合并

新淦峽江間有村鎮名仁和者

不見故鄉人似人亦堪喜何況好家居居然署吾里夾
岸山連延中江水清駛雲樹引征帆魚蝦聚村市笑與
異鄉言吾鄉正如此

萬安道中呈文木

飽食了無事靜看兩岸山修眉隱天外俯鏡堆煙鬟蟠
根穿石罅雜樹生其間楓林迥離立攬攬凌孱顏山意
少岑寂好鳥鳴間關晴雲乍飄度風引時來還愛茲林
巒秀頓忘灘石頑牽江者誰子分寸勞躋攀力與水石
鬪偻背成弓彎吾曹但高枕覓句窮鐫刪倘無灘險驚
不愁風信慳悠悠任清泛寧知行旅艱

過灘

贛江三百灘大者二十四四分仍減一傳自蕭梁季祇

今十八侯一一保名位

查初自十八灘絕句序云按志自贛縣至萬安中有三百灘孟

襄陽所謂贛石三百里是也然陳書云贛水本二十四灘武帝發虔州水暴漲高數丈三百里巨石皆沒止存十八灘耳世稱十八灘者當本此我從萬安來先聲常惴惴吁嗟上水

船習坎何容易捩柁始平移膠杯旋頓置沙石小磋磨

灘師巧趨避我時心語口絕險未相值豈識有名灘翩

然過其二

惶恐標神

怯膽頓開張轉欲領奇致尋聞激水聲

推篷仰而跂一櫂信夷猶所見乃無異從此興闌珊倦

來還睡寐積習自生常無妨失交臂貼水露蠶叢形勢

總相類隨指問篙工厥名難悉記故知曩所傳其數果
不翅三日抵虔州謹呼賀津吏明信辦香爨安穩布帆
曬狎水憶前經臨淵感遐思方當瀕洞初奔流破山至
漱齧出雲根幽宮別蹊隧懸崖日崩豁星竇如雨墜驚
浪引迴旋淤沙助埏埴萬疊聳巍峩千秋頑磊巖嘗聞
八陣圖分行見標識鼓怒捲洪濤水落儼鱗次茲灘實
天造列峙無終始橫磨鋒刃銛直搏爪牙利蛟蜃蓄陰
姦依阻或爲祟造物豈不仁肯存傾覆意積刑者唯川
養威懲恣睢肸蠭應風雲會潭神所司莫遣伺其熾自
然平不陂維昔呂梁游忠信以明志吾徒凜虛誓寧可

告無愧所欣秋水闊一羣渺高寄亂石偃羣牛浮深裁
出鼻隨折作方圓委蛇有餘地清漲百灘空佳譏偶然
遂天幸在遭逢非然敢輕試閒情耽一壑目想殊斌媚
芳樹遠交枝古苔連積翠割取置園池流觴供客醉求
之鄠杜間千金匪虛棄從來飽風浪磊落長神智借助
得江山揮毫脫鞿轡奇境藉詩傳雅音寧不嗣吾觀漁
洋作自喜探靈閥初白小雕鐫徵名特賅備沈吟追兩
大未解效軒輊得間更翻空畏途資笑啞

發南雄

風盛利張帆水盛利鼓柁風水兩緣慳百丈裊婀娜獨

有凌江船

宋凌皓築隄治水今號凌江

三者無一可沙水欲平分水

微沙特夥船行被沙閣一步再三坐篙工困掌距入水
色殊果推排不得去背負雜肩荷宛轉就其深跼嘯口
爲哆誰能學無悶獨笑篷窗我前時苦行潦遵陸儼浮
舸今日水中央不減陸居安嶺嶠頗平夷川途何坎壈
追思淮南語漢法故應花無爲歎留滯安穩計非左正
使破其舟幸無沈沒禍

彈子磯

江津莽迴互夾岸萬峯對兩大誰長雄西華壓東岱嵒
我彈子磯勢欲壅江潰前軒抗龍首中折隱駝背削成

青苗蒼半吐碧流內壁立斷攀援猿飲苦難逮大塊自
璣瓏衆皺頗煩碎蟠根巧穿穴古色紛藻績紫泥螭紐
封白脈犀角戴苔蘚助文章藤蘿掩荒穢濤春礪石齒
谷響通地肺陰崖慘毛髮矜舌不敢欬遙望如小孤前
經苑西塞

武昌縣道士洪亦名西塞山石壁斗峻正與此同

秀拔蘊風姿蘄絕

標梗概因思命名義前志擬更載驚波趨海滙日夜鎮
相代流九止甌與砥柱屹長在迸落睽寒星氣懾萬艘
退誰說李將軍彈射兩無輩南粵昔征行可曾當一隊

志云李廣試
彈處故云

觀音巖

青月言集卷二
風檣掠雲根斗轉絕壁下誰將青螺髻展作翠屏架懸
崖忽中裂石栗迸霜鏤嵌空累層構縹緲見精舍白衣
古仙人時稅補陀駕定力偃波濤魚龍夜朝迓僧居山
水窟意乃苦閒暇疾擢遠逢迎乞索肯相借曾聞拾級
上穿穴轉高跨碎簇蜜脾攢通明箭筈射灌頂得醍醐
石乳露珠瀉緣雲天宇豁眩目吁可怕靈境富苞含漸
入如嗽蔗圖經誠足據彈子特其亞歸舟試窮探預想
片帆卸

觀汪雲尺

德容

前輩遺筆感賦

有序

前輩重閭先生有元龍之雄豪同子厚之蹉跌玉關望

斷舊雨淒其僕以家兄同學同年蚤蒙弟畜去鄉八載
久絕知聞奉使羊城忽瞻遺筆精神風采彷彿平生哲
嗣萬里扶舁片楮都無零落故人有子輟哭何嫌追念
亡兄更爲雪涕

此老真風雅追陪憶蚤年龍沙人去矣馬革志終焉妙
墨今誰繼佳兒自可傳吾兄多撰述亦在虎純邊

鎮海樓

在粵秀山上或題第一樓五層其俗名也

羊城兩旬住體疲人事稠望山不得到俗態爲山羞明
當解維去半日閒須偷獨將一老兵踢馬趨山陬龍祠
亭沼勝花竹枝相樛其西觀音閣褊迫不足留延緣呼

鸞道遂登第一樓番禺坡陀伏

番禺山禺山僅餘培塿無可辨識

識粵秀誰

與儔茲樓實冠冕極北揚高旒飛薨殷南斗夜半升紅
毬嶺海壯都會大勢一覽收雙門尉佗闕穴趾通旌旂
簷楹聊俯視垤封隱虬蟬珠江一衣帶海客萬斛舟飄
飄鳬鷺聚風帆弄輕柔羣山遠襟抱未暇圖經搜東瞻
虎門隘漲海迴狂流百粵尾間在島夷爭搯喉扶胥轉
黃木廣利神宮幽韓碑舊曾記欲往嗟無由想像銅鼓
聲震遠驅蛟虬放眼盡南徼天宇空悠悠逸興俄怪發
豪舉思借籌此邦富才俊北客多停輶論詩蔑曹謝作
賦傾枚鄒何時成彥會選勝同鳴騶四圍游覽畢百尺

階梯抽部署乃先定無暇臨事謀一層置僕馬約敕毋
喧嗽二層給廚膳炙芳酒新篳五層羅絲竹押班居上
頭三四啓高宴升降時環周清談味嘉旨長嘯臨滄洲
琴弦斷續奏壺矢縱橫投妙蹟辨金石珍賞陳尊卣指
揮鸕鵂杓照耀珊瑚鉤興酣呼把筆落紙風颼颼或標
滕閣引或紀蘭亭修或超元虛作或寫仲宣憂鯨吸百
觚盡蜃吐千篇酬傳觀共絕叫起舞聊中休就中選佳
句旋遣新聲謳激揚清商調縹緲凌雲浮埽除炎蒸氣
颯爽成高秋遺響落城市高壓旗亭愁長風送海外仙
樂驚鞦韆東坡龍宮召白傅雞林求熊羆天燄煥采

青原野言集 卷二
垂鴻猷廣宣同文治被之大九州此願幾時遂心口徒
咿嘵清都化人境目想同真游平臺理歸策軒舉形神
道還持詫吾友大言曾賦不

海珠寺

解纜大南門截渡海珠石團團如覆釜沈礎戰朝汐風
磴古榕陰層臺竦百尺扶闌窮遠目山海混天碧維昔
李公存逍遙讀書客天人菊坡樣一語想標格
宋李忠簡公鼎
英讀書於此公號文溪師崔清獻菊坡與之文文山嘗
云菊坡天人文溪菊坡樣人菊坡不可作已願見文溪
其推重
如此
香火舊因緣慈度留賜額吁嗟賢人隱風雨厓
山厄卽今魚籃像疑是慈元蹟畫手重吳生碑陰孰搜

索周垣起睥睨置礮密於柵呼吸海門通中流資控搃
禪有箭鋒機儒多折衝策茲地信兼之寧徒縱游履時
清閑武備海潤朝重譯長慶險巇平終爲秀靈宅中宵
奎壁光奕奕雲霞赤映徹五羊城珠胎凝月魄賢豪應
挺生繼主文溪席仍聞觀競渡勝賞盛疇昔淩波水上
軍習戰匪爲劇粵俗古云何獵較不妨亦我來魚龍夜
清景自寂莫探得智珠無回頭問禪伯

海幢寺

言尋海幢寺寺乃在河南老樹翠交蔭一徑深潭潭臺
殿湧環麗龍象驚談矚仰瞻舍利塔玉甃園金函餘粒

未全瘞僧寶踰驪嶺無緣別眞蹟何必窺眈眈香臺鷹
爪蘭紉枝隱蟲蠶名園歸淨土遺植留精藍經坊血書
在散帙無潛蟬字久作金色慘澹精神含我昔寫華嚴
歷載十二三惜未貯行笈捨此同香龕金剛舊持誦頂
禮歸瞿曇

己未手寫金剛經
小冊是日捨供

我書但墨瀋剝剝非所堪

元宗足妙義奧交憑誰探遠公喜絕俗竹院聊深談東
西各縱步勝賞餘清酣寺後轉閒曠塘水深按藍花田
隔咫尺風送餘香馥北望白雲山暖翠浮晴嵐瀛泉與
蒲澗彷彿鐘聲韻探奇苦登頓旬月停鼻籃豈知平遠
處妙境元包涵緣溪訪鹿豕短碣苔鬚甦善哉龐居士

善果流餘甘衆生具佛性生死同堂參感此念物理故
知生足貪靈龜江北致束縛勞負擔放隨鵝王去前過北峽
關擔夫得龜以十錢贖之至是與一鵝同放寺中 水草惟所耽無煩屢迴顧肘
印滋吾慚僧徒共翫晚讚佛方誦誦一笑竟揮手轉櫂
飛歸驂

游清遠峽飛來寺用東坡和高要令劉湜峽山寺

見寄韻

湜湟遠交會江駛峽重東六六峯鬪高十九地鍾福輕
帆指香岫沙岸檣舟簇懸龕補石罅高下隱寒綠靈蹟
毋重陳諸方耳應熟攬勝自西峯虛堂開帶玉南禺俯

凝碧照影喜淳蓄風磴殷晴雷傳聲動谿谷尋源上高
頂九息倚巖屋支筇到古寺衣冷怯生穀淩雲盪胸次
塵想脫如浴却笑化人居曾爲野猿辱東西宛襟抱地
脈乃緣督中峯結淨域蒼荀散芳酷左轉勢蜿蜒迴旋
珠在掬千仞下松關沿溪繞山腹前瞻帝子祠有軒轅
二子大
禹仲陽塑像
二臣初武侍似別鼎湖促鳳吹月明中仍聞轉雙轂吾
生濟勝具騰嶮幸不跼平臺坐清曠周覽憶標目已作
稚川游誰得達磨肉拜石乳泉飛引潭金鎖縮領要未
窮探十亦傳五六奇葩與嘉卉搜討具別錄歸舟飫清
景啖茗意殊足強擬老坡詩喻日比槃燭

津頭謠 有序

皇華紀聞云曲江忠惠廟祀刺史盧光稠廟中有枯骨
二段云是光稠所斬蛟骨旁有鐵鼓擊之有聲相傳光
稠有一奴坐鐵船搥鐵鼓僅一日夜往來五羊韶至廣九百里
今光稠座側有塑像者奴也按忠惠廟今稱津頭廟鐵
鼓蛟骨並亡

乘鐵船搥鐵鼓一夕羊城返柔艣鐵船沈鐵鼓臥千古
津頭安神坐嗚呼晉許遜秦李冰異人間出盧公代興
卽今風漾澄潭月時有蛟姝泣蛟骨

南雄別從兄谷芳

蘭

南去總將家問斷北歸差喜話團圞樟亭昨夢潮千里
梅嶺初程路百盤霜信日催鴻雁急沙洲風緊鵲鴿難
相逢便是分張地卻望蒲城淚未乾

新淦東山之麓明練子寧中丞故居其書堂有待
月樓革除烹滅町町若荊軻之間矣前令奚又
灝慨想忠烈卽遺址建樓君子表微致可傳述
余不及住游聊紀一絕

倚棹江城曉霧收霜林丹碧錦文稠風流仙令閒相語
遙指東山待月樓

前與文本游飛來寺僧言山澗中產黃蠟石絕佳

僻隱不易致也次日李注目水涯漉取非一爾
後沙洲風阻輒相率探尋自清遠至新淦千八
百里所得日多日益奇勝喜而有作邀李屬和
英韶綰山脈奇石竦雲族五岳方寸間研山有圖錄皺
瘦良足珍有骨乃無肉流膏入地底蒸栗擬黃玉不脛
知自獻乘漲出谿谷舟行貪采掇閱水幾蒿日寶氣有
時見精光蕩朝旭驚呼共漉取一得頗難續癖嗜故無
厭購賞勝督促牽江晚停罷磊落出諸襍俗物竟何知
左右總碌碌風師解人意斷岸一篙卓招邀閒縱步短
策引羣僕沙篆畫縱橫揀金俄滿掬迤邐達西江朝朝

飽余欲洗剔淨苔沙帖安置茵褥悵悵篷窗暗虹采貫
月轂秀質挺躬桓華文簇蒲穀粥粥雞祠雞窠我鹿門
鹿皴皴怒金墓縮胸蠕桑蠋巖阿芝菌乾松根茯苓勵
丹荔映晶盤鉛華襯蛾綠通理重黃中五色轉繁縟肖
物備天巧像設賦殊貌使客倚星槎若士卷龜殼神女
朝陽臺先生古天竺只疑人化石生態宛周足不然化
工手何暇苦雕琢茲游窮萬里志在剖荆璞寧知砭砭
貴遇合徧川陸謹效宋人藏還令次公服雙泛鬱林舟
前修揜芳躅南粵侈歸裝多金一何俗

閱夏貴溪集

建昌三日雨門館靜車塵飽看桂洲集長懷晁錯身隆慶

四年賜卹制遽因套議入讒惑三至於曾參青詞同媚

之杼竟與閭臣連逮伏五刑於晁錯之身並以愍諡

九江聞雁有感

當年西上望吾兄
湓浦風鐙颭旅情
愁聽江城吹角調
催成估舶詠新聲
萍蹤信水長流轉
荆樹凋霜半死生
孤館清宵還制淚
可堪寒雁失羣鳴

絕

行次定遠姪三品遺力奉大兄遺集至泣題十二

孤雁南飛憶斷行
生離死別兩相望
江湖忽訝逢魚勝

知自并州返故鄉

清白承家是子孫雨雲翻覆更無論囊空贏得詩文富

小樹新亭世業存

先祖令樂亭牧師宗並入名宦兄在

額先君晚號新亭老人詩集待刊者千餘首兄讀書小樹軒因以自號

九歲哦君誕日詩讀書得力遠相期寧知豎子成名後

便是仙臈化去時

歲在庚寅兄年三十子始九齡

叢碧高樓共一燈文章與窈挾千層卽看庚癸年間作

半是窗前授稿謄

子自戊戌從兄讀書范氏叢碧樓兄舉庚子子舉癸卯

經濟平生竟若何惜從書記半消磨交游總說詩文好

豈識中年治譜多

書生只解擁青氈百里時間撓小鮮我自譽兄人不信
試聽遺愛滿環川

才名何慮滯春官降志都因捧檄歡甘旨供餘封樹了
一棺翻痛戢身寒

袞袞諸公制舉收竟緣祿養獨遲留若教待詔公車署
如此詞科有媿不乾隆丙辰特舉制科涂大司空天

弟兄師友得江聲打鉢催詩夜未停遺句或煩芟訂在

尺書和淚致丁寧兄昨歲需次在都與江聲兄倡和數月平時酬答甚多

昨歲謀刊棣萼文翛然軒鶴迴離羣從今急作編排計
雙管生枯帳早分

庭闈列侍笑顏溫
送難徵奇舌本翻
帖帖同悲兄又逝
一門風雅復何言

征騎蕭蕭晚卸銜
自開驢背錦囊緘
援琴莫歎風流盡
神解先看有阿咸

岳忠武祠

在徐州桃山驛

靈祠傍驛開
廟貌凜幃鉞
前楹北伐句

有滿江紅詞及手書送張紫巖

北伐五律二首

孤憤氣激越
西湖埋骨地
壯志恨不卒
卽此望

中原鐵馬勢橫突
颯爽動陰風
神依舊宮闕
平生忠孝

心炯炯臨邊月
我來瞻宰木
不見南枝發
獨有通明碑

森沈逼毛髮

壁間有碑無刻瑩徹如鏡守祠者以水沃之洞見毫髮號爲通明碑

靜廉齋詩集卷二終